



***Zeddel***  
***18. – 20. Hornig 2013***

**D Zoggelischletzer wänns jetzt wisse  
Sin die grangg oder wärde mir bschisse  
D Fasnacht, s Syjet und s drum und dra.....  
Unter:[www.zoggelischletzer.ch/](http://www.zoggelischletzer.ch/)**

### **Zoggelischletzer 2013**

**Syjet:**

**Vogelgrippe, Schweinegrippe, Schwedengripen  
bevor si däm Fluugi d Fliigel stutze dien mir ihn als Syjet  
nutze...**

**Nur mit aim P schribt sich die Schwalbe  
Und kunnt ganz bestimmt nid us dr Dalbe  
Hoch im Norde isch sie dehei  
Kunnt jetzt in d Schwyz und das nid elai**

**„Vogel“ oder „Schwein“, Schwyz oder Schwede  
Tout Bâle duet do driiber rede  
Isch's e Grangged oder e Vogel us Stahl  
Oder vo beidem e weeneli, mir isch-s egal**

**D Axalp het dä Gripen iberfloooge  
Mi duet sie aber do in Basel blooge!!!  
Oder maint-me wieder die us Staal???  
I kumm nid druss, es isch e Qual**

**„Saabo-Mobil“ als Schutz vor „i ha kai Aanig“  
Oder Grippe-Impfig als EVENT „isch in Planig“  
„Verunreinigung“ am Himmel oder in de Vene  
Isch amänd das Stoff zum verweene?**

**D Nase vorne und s Renne um d Macht  
Het denn doch dä Nordländer gmacht  
Dass mini Nase nimmi so lauft  
Ha ich ebbis in dr Abideeg kauft**

**Dr beshti Schutz zum beschte Bryys  
Kunnt jetzt us däm ewige lis  
Au ich ha kalt und glaubet mir  
S Bescht fir d Nase Huushalt-Bapyyr!!**

**Dä Kampfvogel, gschriebe mit aim P(ee)  
Het scho mäenge am Himmel gseh  
Au ich ha e Vogel, ihr wüsets genau  
Oder ischs amänd doch dä mit dr Sau?**

**Dä Vogel fyr 100 Kische pro Stigg  
Isch denn doch zem guete Gligg  
Im Usverkauf no billiger worde  
Und koschtet uns weniger als dene vom Norde**

**Ihr meint nid ich red vom Jet??????  
Ich ligg do nämlig grangg im Bett  
Säuli oder Vogel, Kampfjet oder nid  
I bekumm das Thema nid ganz mit**

